



## **Universitätsbibliothek Paderborn**

**Occupatio animae Jesu Christo crvcifixo devotee.**

**Leroy, François**

**Pragae, 1666**

Caput IV. Apud se in cubiculo, Christi crucifixi effigiem aliquam habere.

[urn:nbn:de:hbz:466:1-47123](#)

Hic observo denique: quemadmodum iij quos paulo  
antem memoravimus, Christum posuerunt ut signaculum su-  
per cor suum; ut omnia sensa ac vota sua, Crucifixi memo-  
riam, tanquam sigillo insignirent: ita etiam plures fuisse, qui  
illum propriè ponerent ut signaculum super brachium su-  
um, inusto scilicet arte quadam in brachijs aut carpis, crucis  
signo aut IESU nomine, quo crucis Dominicæ recordatio-  
nem ita quasi ad manum haberent, atque exinde omnia  
ipsorum opera ipso Christi nomine quodammodo sigillata  
& consecrata apparerent. Quem quidem morem quon-  
dam apud multos invaluisse, ex ijs discimus, quæ scribit Laurentius  
Ramirez in Chronicon Luitprandi; & ex antiquis  
Procopius Gazæus in caput 44. Isaiae. Constatq; ex historijs  
recentioribus, quosdam populos Orientales, etiam inum-  
crucis cauterio inustum brachium habere.

## C A P U T IV.

*Apud se in cubiculo, CHRISTI crucifixi effi-  
giem aliquam habere.*

### §. I.

*Eam rem merito Christiano cuilibet commendata esse debere.*

**A**Quum sanè foret Christianum quemlibet, eosq; præ-  
sertim, quorum limina, ut nobilitate dignitatè præ-  
stantium, cum primis celebrantur, ædium suarum conclavia,  
tum alijs pietatis monumentis, tum (& præcipue) vitæ ac  
passionis Christi imaginibus, convestita habere. Primùm,  
ut eà religione ædes suas quodammodo consecrent. Dein-  
de, ut hac tanquam tessera, profiteantur se esse quod sunt;  
hoc est, Christianos. Postremò, ut hac ratione summotis  
noxijs rerum turpium simulacris, suo aliorumq; pudori atq;  
saluti

saluti consulant, & pro obscenis speciebus, castas ac sanctas cogitationes ingeant.

Quo in genere (ut obiter hoc dicam) probrofa videatur nimia quorundam licentia; quorum aulas ingressus, usque adeo rerum, non profanarum modò, sed etiam pudendarum formis, palam & ob omnium oculos prostitutis, de turpata verius quam exornata spectes omnia; dubitare ut possis (adidum apparatum quod attinet) hominisne Christiani domum, an à Christiana religione alieni testum ac latrem intraveris.

At quanto nobis sint, hac quidem in parte, Schismatice Moschi religiosiores, vel hinc licebit cognoscere. Habet eorum quisque in suis aëribus, Passionis Christi aut similem aliquam religiosam imaginem: cùmq; alter alterum convenit officij negotijs gratiâ, non continuò ad Dominum domus consalutandum convertitur; sed aperto capite ante omnia circumspicit, ubinam imago sit, cui profundè caput inclinans, ac tertium ducto crucis signo se muniens, eam brevi prece veneratur: tum ijs deinde transactis quorum gratiâ venerat, non priùs domo pedem effert, quam eandem imaginem eadēm qua priùs religione salutaverit. Ita Alexander Guagninus in sua *Moscovia* cap. 4.

Verum alijs prætermisssis, id modò unum à te contendomi Christiane; ut ad Salvatoris passionem crebrius familiariusq; recolendam, intra cubiculum aut conclave secretius, effigiem Christi crucifixi aliquam habeas; quem velut præsentem in sua imagine observes, in cuius conspectu atque oculis verseris assidue, eumq; modò ut socium ac contubernalem, modò ut actionum testem ac præsidem, modò ut amicum ac secretorum consciūm, alias ut præceptorem domiciliū officij, monitorem, aspicias; à quo denique incertus in rebus consilium, auxilium in arduis, refugium in periculis, levamen in molestiis, solatium in adversis expectes. Hac generatim: speciatim autem ista licebit observare.

## §. 2.

*Christum crucifixum, studiorum, laborum, actionumque familiarium, testem & adjutorem adhibendum esse.*

**P**rimum; ut ejusmodi effigiem eo tibi loco constituas; unde facilè incurrat in oculos, ut ex obvio, crebròque ejus aspectu utilitatem ac fructum capere possis. Imiterisque in primis B. Catharinam Genuensem, quæ etiam octen-  
Vit. c. 1.  
nis puellula (prout in ipsius vita legimus) propositam ha-  
bebat in cubiculo piam Christi patientis tabellam, ad quam  
quoties cubiculum ingressa, memores oculos converteret,  
toties intimis afficiebatur sensibus, illorum tormentorum  
recordatione, quibus suâ causâ subijci voluisse Salvator  
benignissimus.

Eritque admodum salutare, & majoris fructus quam  
impendij, exercitium; quoties cubiculum ingrediaris, pio  
aliquo oculorum conjectu, & levi capitinis inclinatione Cru-  
cifixum salutare, & in ejus tutelam ac præsidium te tuaque  
quasi restituere; rursusque cum egredi contigerit, codem  
pacto, aut etiam osculo ad ejus pedes aut cor appresso (præ-  
fertim cum longior futura videtur absentia) veniam & ve-  
lut commeatum exposcere.

Ac denique sub noctem, de more proborum filiorum,  
(qui non prius cubitum concedunt, quam faustâ parentum  
precatione donati sint) priusquam acquiescas, sanctissimis  
Crucifixi manibus ac custodiæ te committere, bonamque ab  
eo & placidam noctem exorare.

Ut jam his non addam subinde extitisse nonnullos, qui  
ipsum Crucifixi simulacrum, vel secum in strato compone-  
Vit. P. Bern. nard. lib. 1.  
cap. 12.  
rent; vel (quod de Simone Sacerdote Valentino, & de no-  
stro item P. Bernardo Colnago in eorum vitis proditum est)  
ipsi humi jacentes, pro se in lectulo collocarent: aut etiam  
qui, omni strato abjecto, in nuda & dura cruce, noctem bre-

vi

*L. I. Vit.  
cap. 11.  
Ioan. Rbd  
6. 3. et c. 2.*  
vi somno ducerent; in quo item numero fuit è nostris hominibus P. Dominicus Valesius. Cui affine illud de Venetabili Maria Raggiā, quæ crucem ligneam (quam Sponsum appellabat) ulnis complexa, super nuda tabula dormiebat.

Eodemque denique referri potest, pium Simonis Rodericij à nobis antea memorati in Crucifixum studium; qui in cubiculo habere solebat prægrandem Crucem, lucente per noctem ante eam lampade, ad quam, quoties evigilabat, oculos animumque, cum speciali aliquo pietatis sensu, referre consueverat.

Veruntamen istæ non omnibus passim ad imitandum proposita sunt. Satis enim scio non omnibus omnia congruere: estque ratio habenda communis nostræ infirmitatis, cui consultius erit, pauca quædam & medicoria cum constantia tenere, quâ plura & grandia non duraturo conatu amplecti. Spectanda igitur unicuique erit virtus sua & officij conditio; & è multis, quæ subinde suggerimus, ea diligenda quæ magis ad vires, genium ac gustum facere videbit: ne plura quam par est, aut viribus suis minus conscientia suscipiens, vel naturam suam violentus prægraveret, vel ea etiam, quæ moderatè sumpta, constanter ac jucundè retinueret, tædio vicius abjectiat. Quod hic semel monitum, de alijs similibus erit intelligendum.

*Secundum:* ut quidquid operis in conclavi faciendum suscepis, id omne sub oculis Crucifixi facias, eumque non testem modò actionum tuarum, sed laborum etiam prædem atque adjutorem adsciscas.

Itaque si, exempli causâ, literarum studijs des operam, Crucifixum habeto super mensulam, aut sanè in conspectu cui studiorum tuorum labores omnes offeras, ad quem identidem respicias, à quo lumen in rebus obscuris ac difficilibus depositas; postremò, sub ejus umbra, ut ita loquaris, subinde desidens, à studiorum tuorum labore nonnihil respires;

spires & interquiescas. Ut enim admonet etiam S. Vincen-  
tius: *Sepe dum actu studes, à libro debes ad horam oculos a-  
vertire, & oculis clausis te in Christi plagiis abscondere, & ne-  
ratore ad librum conversere.*

*De sit. sibi  
cap. 10.*

Quam in rem notum est exemplum Seraphici Bon-  
aventuræ, qui ( ut ipse de se Angelico Doctori professus est )  
hunc codicem unice & assiduè lexitare, ex eoque præsertim  
proficere, ac sublimes illas cogitationes ac pia sensa haurire  
conseverat. Quod item de primis sui Ordinis Patribus  
ipse Bonaventura testatur in vita S. Patris Francisci; qui  
nempe recenti adhuc Ordine, cum sacrorum Doctorum li-  
bris destituti essent, loco illorum ( inquit ) *librum Crucis Chri-  
sti continuatis aspectibus, diebus ac noctibus revolvebant.* Eo-  
démque in ludo eruditus B. Petrus de Alcantara, cum sacris  
Biblij solum Crucifixum habebat in cubiculo, in eoque per-  
volutando crucis codice & ipse assiduus erat, & alijs, ut eum  
præ cæteris legerent, svadebat. Theologi cujusdam è sacro  
Ordine Prædicatorum, eo in genere religio, memorabi-  
lem hunc eventum habuit. Solebat is, sumptâ Crucifixi  
imagine, & ad caput libri super mensam collocatâ, in eom-  
muni Bibliotheca ad multam noctem lucubrare. Nocte,  
quadam ita lucubranti, visus est intempestivus nescio cuius  
tuba sonitus insonare; primum obscurior, & quasi è lon-  
ginquo, exinde clarior clariorque & tanquam proprius a  
proprius ad aures appellens; donec prope hominem consti-  
tit tuba inaspeptabilis, paventem, & à Crucifixo pacem ac  
veniam postulantem. Quam ille tubam, judicij sui mor-  
tisque propinquæ significationem interpretans; sub auro-  
ram Priorem adjicit confessionis gratiâ, postulatisque Sacra-  
mentis cæteris ( cum sanus alioqui videretur ) haud ita mul-  
to post excessit è vivis. Ita Joannes Severanus, ex Historia

*Pri: storia  
pag. 572.*

Ordinis Prædicatorum Provincia Aragoniæ.  
Tandémque, ne plures proferam, Franciscus quoque

*Q. 2*

*Sua*

*Ante tom:  
de Angeli:*

Suarez, vir è Societate nostra, quemadmodum celebratissimæ doctrinæ, ita & virtutis eximiæ; si studijs inherenti, (inquit Autor vitæ) questio aliqua per difficultis, nodusve implicatus occurreret, ante Christi è cruce pendentis effigiem, divine lucis radios à Patre luminum mutuabatur. Quantâ porrò exinde lucis copiâ mens ejus illustrari soleret, argumento sit ille aspectabilis, sed insolitus admirabilisque splendor, qui aliquando de effigie Crucifixi promicans, rectâ in Suo vultum ac pectus sese vibrare conspectus est, ipsòque repercussu Musæum omne supra Solis splendorem collustrare; cùm ipse ante hanc effigiem, plicatis genibus suspensus, ac duos ferè cubitos ab humo sublimis cerneretur; uti testatur ejusdem vita.

Attamen quæ hîc præcipiuntur, non de divinarum dunt taxat rerum studijs, sed de humanarum quoque intelligi & usurpari debent. Siquidem & ista, jam commemoratis exercitijs, aspergenda & condienda sunt; quæ nempe & illis aliquam sanctitatem impertiant, & de cœlo lumen aspirent, & tædium levent, & animum addant, ac non injucundâ intermissione atque alternatione relaxent; ac demum, Christo opitulante, omnia procliviora captu, & usu faciliora reddant. *Pietas enim, Apostolo testè, ad omnia utilia est.*

*I. Tim. 4.*

*lib. I. t. 8,*

Eadem denique valere debet præceptio, quoquo tandem opere, pro rûx professionis ratione, in conclavi manus exerceas; & hoc etiam magis, quod manuum labor, quod operantis mentem minus occupat ac distrahit, eò ampliorem pījs ejusmodi ad Christum crucifixum respectibus, suspirationibūsve relinquat facultatem. Atque facilis est & amabilis industria, quod in vita Venerabilis Catharinæ Ricci ex Ordine S. Dominici, de quadam ejus Monasterij Virgine proditur, Helenâ nomine: quæ, ut erat assidue in dolorum Christi commentatione occupata, inter alias artes sole-

solebat in opere faciendo rosas quinque ( ubi corum florū tempus esset ) in crucis modum præ se in mensula dispone-re; eaque industriā, non tam oculos florū aspectu, quam anūmum plagarum Sponsi sui memoriam & imagine pascere.

## §. 3.

*Ad eundem in temptationibus alisque molestijs esse  
recurrentium.*

**T**ertium: ut Christi crucifixi effigiem in promptu habens, in illa paratum perfugium, ac præsidium salutis habeas in temptationibus ac periculis, & hoc tanquam domestico asylo ab omni malorum incursu tutus existas.

Planè enim hīc opportunum est B. Hieronymi breve *Thom: Hi-* præceptum: *Si ingressi fuerint ad te latrunculi per oculos, per bern-* *apetum crucis opprime eos.* Incautior aspectus aspectu san-  
ctiore sanandus est, & ignitorum serpentum morsus, salutari signi inspectione excantandus. Unde etiam & illud S. Bernardi ad Hugonem Novitium: *Si temptationum sentis ac Ep. 351.*  
*culeos, exaltatum in ligno serpentem aneum intuere; & fuge,*  
*non tam vulnera, quam ubera Crucifixi.* Quod etiam pluri-  
bus persequens S. Augustinus in Manuali, in cāmque rem-  
suum ipse experimentum allegans: *Cum me pulsat, inquit, cap. 22.*  
*aliqua turpis cogitatio, recurro ad vulnera Christi.* *Cum dia-*  
*bolis mibi parat insidias, fugio ad viscera misericordiae Domini  
mei;* & recedit à me. Si ardor libidinis moveat membra  
mea, recordatione vulnerum Domini nostri filij Dei, extingui-  
tur. In omnibus non inveni tam efficax remedium, quam vul-  
nera Christi.

Te igitur felieem, si hoc tam præsente perfugio fami-  
liariter uti noveris; in omni discrimine ad Christi vulnera *Ps. 26.*  
confugiens, & velut ( quod ait Propheta ) in abscondito di-  
vini tabernaculi, in corde inquam Christi crucifixi, te ab-  
scon-

feondens; denique, ex ejusdem Prophetae monito, parvulos Babylonis (hoc est ipsa prima pravarum cogitationum, femina) ad Petram, seu Christum crucifixum allidens. Sentes subinde vel solo Crucifixi conspectu in te extingui omnia tela nequissimi ignea, impurāsque omnes imagines, & istam quam appellat S. Hieronymus dulcem libidinum, pompam, continuò diffugere à facie ejus: ipso denique usū atque experimento comperies, adversus omnes infirmitates carnis nostræ, livore vulnerum Salvatoris nullum esse malagma præsentius, nullum remedium efficacius. Proinde & ad præcavenda oculorum pericula, non mediocrem utilitatem habebit, id quod alio sensu dicit Scriptura, ut si vita nostra pendens ante oculos nostros, vitalem nimurum Salvatoris nostri in cruce pendentis speciem assidue præmentis oculis, tanquam præsentem, circumferendo.

Neque vero dubium esse debet, quin illo ad sese crebro ac fiduciæ pleno recursu delectatus Dominus, specialiter curā protegendum te suscipiat: quemadmodum de pia Virgine, cui nomen Elisabetha Wansia, testatur Thomas Cantipratanus. Quæ cùm patientis Christi cruciatus nunquam è memoria deponeret; Christus crucifixus totos trés annos ita illam comitatus est quocunque se ferret, ut si quæ forsitan impuræ cogitationes animum pulsarent, ille revulsum à cruce manum ejus pectori admoveret, omnemque confessum impuritatem abigeret.

Si porrò gravior tentationis vis ingruerit, instetque tibi pertinaciū, age (ejus rei ubi opportunitas fuerit) Crucifixum in manus, aut etiam in sinum sumito; contemplare amantissimi Domini vultum, non tam mortis vi quam amoris, in te propensum: ingredere, quæ licet, in cor illius afflictiissimum, plagas ejus & membra omnia sollicitis oscillas lacesse, in manus illius animam tuam commenda.

Dicito illi ista de Scriptura, quæ exempli gratiā hic ponimus:

nimus: Amabilis JESU: *Affice in me, & miserere mei. Domine, vim patior, responde pro me. de vultu tuo judicium meum prodeat. Si insurgat adversum me pratum, in hoc ego sperabo. Exurgat Deus, & dissipentur inimici ejus. Esto mibi in Deum protectorem, & in dominum refugium. Sub umbra altarum tuarum protege me. Domine, salva nos, perimus. Non me derelinquas usque quaque non avertas faciem tuam a me. Non peccabo in conspectu Dei mei. Propitius sit mihi Dominus, ne faciam hanc rem.*

Addere potes & illa in primis hic pertinentia:

*O bone IESU exaudi me: Intra vulnera tua absconde me: Ne permittas me separari a te: Ab hoste maligno defende me.*

Et his similia, quæ affectus aut usus suggereret: quibus etenim insistere poteris; dum, tempestate discussa, animo redeat desiderata tranquillitas.

Idem sibi habebat tentationum perfugium S. Hieronymus; quando inter deserta agenti (prout ipse scribit ad S. Virginem Euchochium) recursabant Romanæ deliciae, & scorpionum tantum socio atque ferarum, ob oculos choroi obversabantur puellarum. *Itaque (inquit) omni auxilio dispositus, ad IESU jacebam pedes, rigabam lacrymis, crine tergebam, &c.*

Eodemque rursus persugio tibi utendum erit, quoties, si non illecebrosa tentatio, at anxietas animum, ægritudo, mestitia, tenebrae, solitudo occupaverint. Sed quoniam eam rem parte 4. cap: II. ubi Exercitium resignationis animæ defolatae inter brachia Crucifixi tradimus, diligentius exequimur; idcirco pluribus in praesentia supersedemus.

#### §. 4.

*Coram eodem precandum; & alia quevis, tanquam cum amico fidelissimo, conferenda.*

**Quartum:** ut cum tibi precandum erit, aut divinorum meditationi vacandum; ante Crucifixum id quoque

agere instituas. Juvabit ipsa Crucifixi praesentia, tum ad varios sanctos affectus, vel ipso Crucis intuitu, concipientes; tum ad reverentiam attentionemque animi, ad ea quae tecum meditabere, retinendam, & cordis tui instabilitatem, eis oculis objecta specie, efficacius coercendam.

Quapropter si inter orandum, animum tibi longius evagari ac peregrinari sentias, continuo oculos ac mentem ad aspectum Crucifixi revoca; sensus tuos dispersos intra ejus vulnera recollige, & cor tuum vagum & instabile in ejus praesertim sacro latere desige. Sic enim etiam facilitasse video S. Bonaventuram; cuius ista est ad Crucifixum oratio:

P. 1. 1. 1.

Stim:

cap. 15.

*O bone IESU, nimis saxeum est cor meum, nisi mollescatur sanguine tuo: nimis distractum est cor meum, nisi recolligatur in latere tuo.*

Quod si forte cœlis imbre suum negantibus, tibi cor aridum, & anima sine humore est, nec sapere potest quod piæ meditationis argumentum sumperis; adhuc tamen oculos mentemque, quantumvis arentem, in Christi aspectu defixam tene, ejus sacra membra & plagas amabiles sigillatim otiosèque contemplare, eam Crucifixum inspiciendi perseverantiam, pro omni oratione habe. Neque si, vel horam, absque alio interiori gustu, in sola imaginis Crucifixi contemplatione perstiteris; pigeat te orationis insipidæ, aut temporis malè collocati. Ille quippe constans ac pius Crucifixi aspectus, præclara quædam atque efficax oratio est: quando & ea humilitas habitusque corporis & animi de Crucifixi vultu pendens, vocis instar habet apud Deum; & ipsa species Crucifixi, quem in ejusmodi ariditate cordis pro nobis quodammodo substituimus, vicariaveri ut operâ pro nobis Patrem interpellat atque exorat: ut hic etiam valeat illud S. Ambrosij libro de Isaac & anima:

*Ipse ( scilicet Christus ) sit vox nostra, per quam loquamur ad Patrem.*

Qut

Quare velut mendicus quispiam, in conspectu divitiorum timide ac verecundè consistens, etsi ore taceat, ipso tamen vultu cæteroque corporis gestu, stipem exorat: ita debes & tu, in illa spiritus egestate, coram Crucifixo, pauperculi instar humiliter, modestè, perseveranter assistere, & eâ perseverandi instantiâ, stipem cœlestem tuæque paupertati opportunum subsidium emendicare.

Quod etiam pertinet quod apud S. Bernardum ( si tamen ejus est opusculum illud ) in libro de natura & dignitate divini amoris, legimus: *Anima ( inquit ) sicut imops, sicut mendica, sperans, suspirans, inspicit, suspicit, si quid sibi porrigitur, si quando aperiatur: & aliquando, importunitate & improbitate suâ, sic evincit omnia obstacula, & transgreditur usque ad interiorem Sapientiae mensam, &c.*

Itaque potes per intervalla, egestatem tuam agnoscens atque prætendens; aut de derelictione tua amanter ac blandè conquerens, illud Prophetæ usurpare ad Deum: *Iste pauper clamavit ad Dominum; vel illud ejusdem: Tibi derelictus est pauper, orphano tu eris adjutor; vel illud denique: Vide humilitatem meam & laborem meum, & dimitte omnia peccata mea.*

Potes etiam ( quando iste sensus in Chananæ muliere tantum Christo placuit ) catelli instar habere te, qui ad hærem mensam assistens, & Dominum suum etiam silentio respectans, sat intelligitur illum admonere victus atque indigentia suæ. Forsitan & tibi dabitur denique edere saltem de micis que cadunt de mensa Domini tui. Veruntamen, utut sese habebunt reliqua, optima erit hæc oratio, et si minus succedat quod paraveris. Tantum torpor absit, & voluntaria nauseantis animi evagatio.

*Quintum & postremum: ut istum quasi amicum unicum, ac fidum sodalem, Christum inquam crucifixum apud te habens, cum illo tuis de rebus, quæcunque tandem ex-*

R

fue-

fuerint, familiariter amantēque conferas; cum illo, post curas atque labores, fatigatam mentem subinde recrees ac reficias; cum illo denique (cū temporis aliquid vacuum tibi fuerit) omissis frigidis, quæ ab aliorum amicorum convictu ac consuetudine expectari possunt, solatiolis, otium temporis sancte ac jucundè oblectes. Ut enim recte cum

*Expl: pag. cap. 16.* Joanne Thaulero Lætiensis Abbas: *Quid possit amanti ame esse suavius, quam ut post distractiones, labores, perturbationesque multas in hac lacrymarum valle (velit, nolit) ei occurrentes, eamque fatigantes, sub hac salutifera crucis umbra respiret, sese reficiat, sensus dispersos colligat, animamque et hanciam delectabili arboris bujus fructu confortet?* Hæc ibi,

Eodem facit Exercitium, quod ob materiæ similitudinem capite sequenti adjungimus: quamvis possint hæc & quedam similia, etiam ad partes sequentes, sive ad interiorem aliquam animæ occupationem pertinere.

## C A P V T V.

*Sumptā in manus Christi crucifixi effigie, sese subinde ad bonam mortem exercere.*

### §. I.

*Ejus Exercitiū, tum necessitas, tum utilitas, ostenditur.*

P Ræsens exercitium propterea seorsum proponimus, quod & super eo pluscula nobis dicenda sint, & ad bonam mortem (à qua omnis pender æterna nostra felicitas) non mediocrem vim videatur habiturum esse.

Id autem est hujusmodi: ut ab omni cura molestiori feriatus, cùm te animo tranquillo, proindeque ad divinos sensus magis composito, esse senseris; partem aliquam temporis tibi deligas, quæ clauso ostio cubiculi tui, & sumptu-